

86.

# DEO OPTIMO MAX.

## UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

### QUÆSTIO MEDICO-CHIRURGICA.



QUODLIBETARIIS DISPUTATIONIBUS  
*manè discutienda, in Scholis Medicorum, die Lunæ decimæ-septimæ  
Martii, anni M. DCC. XXXVIII.*

M. JOANNE - BAPTISTA SILVA,  
Salubris Consilii Regii Socio, & Serenissimi Ducis Bor-  
bonii Medico ordinario, Doctore Medico, Præside.

*An qui Tumores deleri debent, Ferro potius, quàm Cauterio  
potentiali, delendi?*

#### I.

**P**ROTUBERANT passim in corpore humano Tumores, mole, figurâ, colo-  
re, duitie, cæterisque adjunctis adeo dissimiles, ut, licet ad genus aliquod pos-  
sint ut plurimum revocari, de specierum numero nondum satis constet. Inter eos,  
complures universalibus modò, modò particularibus remediis, sæpè utrisque, vel  
ad suppurationem, vel ad resolutionem feliciter perducuntur. Quæ si frustra tentata  
fuerint, superest, crudele quidem, at non semper rejiciendum præsidium. Ex ipso  
enim amaritudinis fonte surgit aliquid grati, sanitas nempe, quo dolores possint  
abundè simul & jucundè pensari. Consistit illud opus in Tumore auferendo, quod  
instrumento multiplici confici potest. Vel enim funiculis religatus Tumor, aut iner-  
mibus digitis prehensus convellitur: vel laqueo paulatim, ab imis radicibus, sic  
strangulatur, ut spontè post paucos dies decidat. Leniter etiam contorqueri potest  
ope forcipis, aut ignito ferro comburi. Duo sunt tandem vulgarioris usus, Cauter-  
ium, quod aiunt, *Potentiale*, & Cultellus, quorum primo Tumores sensim con-  
sumuntur, altero, statim rescinduntur. In iis interim abolendis sunt multa, ad quæ  
nisi sedulo advertatur, opera erit, si non semper exitiosa, saltem aut difficilis, aut  
parùm fructuosa. Primò igitur quæ tolli debent ea tantummodò, at omnino tamen,  
tollantur. Cutis, quantum res sinat, post factam operationem, integra remaneat. Ar-  
teria aut vena insignis, si qua vel incautè, vel necessariò aperta fuerit, conspectum  
non fugiat. Tendones, nervi, membranae ne molestè quoquomodo afficiantur. Quàm  
brevissimè fieri potest, pars affecta doleat. Ex Cauterio autem & Ferro, alteri præ-  
ferri debet alterum quod supra memorata valet præstare.

A

**C**UINAM usui tot, inter operandum, astutiæ si quis scitetur, in promptu ref-  
ponso est. Plurima, nempe, simul ex iis exurgere commoda, & arceri pericula.  
Enimverò si Tumor sic auferatur, ut nihil ex eo supersit, quod recidivæ metum in-  
cutiat, aut quoquomodo sit nociturum: nec interea cæterarum partium ulla lædatur  
quæ servari debent, feliciorem curationem consequuturam esse satis elucescit. Dein-  
dè cutem non deleri parvi non est. Hoc pacto potest, intra paucos dies, cum fun-  
do vulneris coalescere. Illud si præstari possit, præcavetur suppuratio, quæ, si nimis  
copiosa fuerit, debilitatem summam affert, imò lethalem sæpè *marasmius*, si suppres-  
sa, febrem & inflammationem, si moderata & laudabilis, tardam curationem. Non  
est tamen diffidendum adeò oportunam quandòque esse suppurationem, ut sæpè,  
absque noxâ, prohiberi non possit. At nobis satis erit, si, nonnullis in casibus, uti-  
liter prævertatur. His etiam addendum videtur cutem, cujus usus ignotus nemini,  
ubi semel sublata fuerit, arte nullâ posse reparari. Num itaque rem levissimi mo-  
menti crederes, quòd, ipsâ deperditâ, cicatrice, in plurimos menses protractâ,  
veluti precariò, vulnus obducatur? Præterea unum tantùm contingere potest, ut  
reverâ non semel contigerit, arteriæ alicui, scilicet, aut venæ insigni iussidum  
fuisse vulnus. Huic calamitati, prænitâ ligaturâ, succurrendum. Sed quânam arte  
præfens adhibebitur auxilium, nisi instrumenti, inter operandum, delectu, cau-  
tum fuerit quominus apertum vas, intra circumfusâs carnes, citâ contractione,  
delitescat. Quod tendones & nervos spectat, nemo nescit eos sensu exquisi-  
tissimo esse donatos, ob eamque rationem faciliè admodum irritari. Levi de causâ  
dolorificè convelluntur, undè oriuntur tensio maxima, durities, longè circa partem  
affectâ, quandòque abscessus periculosissimi, nisi citius delirio, convulsionibus,  
imò ipsâ gangrænâ supervenientibus, mors accita fuerit. Longioribus tandem do-  
loribus hominem torquere inhumanum est, quem brevioribus sanare possis. Quæ  
ratio, si cuiquam non ardeat, febrem, vigiliam, virium lapsum, solitas longio-  
rum dolorum comites, consideret.

## I I I.

**P**LURES sunt Tumorum species, quàm ut singulas possimus describere illud  
tantùm monemus, de Tumoribus omnibus hîc non agi. Permulti siquidem ob-  
servantur à quibus non temperare manûs nefandum esset, velati quandò aut ner-  
vis, aut tendonibus hærent, aut vasis majoribus, quarum partium summi disci-  
minis foret vulneratio. Nec etiam deleri debent qui, longâ morâ, maximam in  
molem creverunt, nisi fortè tenui pediculo, quod rarò tamen occurrit, pendeant.  
Sant è contra quos parùm sapienter intactos relinqueres. Tales sunt qui pondere  
nimio, situ inopportuno, partem aliquam valdè gravant, sicque organi alicuius ad  
vitam necessariî functionem intercipiunt. Non magis ignoscendum est iis à quibus  
timeri potest ne, lapsu temporis, in immensum augeantur, aut, pejorem induendo  
naturam, in ulcus mortiferum desinant. Ex hac prolapsiâ, instar omnium sint *Scir-  
rhus*, Cancer, & præterea Tumores nonnulli qui, ratione materici quam conti-  
nent, diversa fortuntur nomina. Si ea nempe mel referat, *Melicerides*, *Arbero-  
mata* si pulciculam, si sebaceum quid aut adiposum filamentis membranisque inter-  
textum, *Scatolata* nuncupantur. Hæc solâ ratione differunt. At illud inter se  
commune habent, quod singulorum materia, plerumque sacculo comprehendatur;

3.  
 qui facculus nihil videtur esse quam folliculus adiposus, præter naturam, valde amplius. Hujusmodi verò sacculi quandoque sic indurantur, ut æmulentur corium duritie. *Scirhus* est Tumor inæqualis, durus, renitens, indolens, persæpe in glandulis, prægressâ plerumque inflammatione, nascens. Consistit autem in congerie quadam abnormi atque intricatissimâ vasorum induratorum, quæ, lymphâ inspissatâ, maximam partem, obturantur. Facile in Cancrum potest migrare, cum, pressione jugi, succis concrecentibus, vasculorum cavum omnino oppletur. Tunc circuitus sanguinis ibi penitus deficit, magis ac magis indurantur vasa, crescit tumor atque exporrigitur in radices quæ ad corneam duritiem assurgunt. Pruritus sentitur molestus, dolorificus. Tandiu se res habet, quamdiu non ulceratus est Cancer. Sed concretus humor tandem expanditur. Quicumque autem de causâ, vehementiori fortè sanguinis impulsu, calorem concipiat, turgescit in parte affectâ tantò majore æstu, quanto violentius compactus fuerit. \* Tunc non simplex dolor urget, sed cruciatus intolerabilis, quasi tractus ignei. Cutis succo rarecente pressa nigrescit, corripiturque gangranâ ac tandem rumpitur. Hiat ulcus sædum, marginibus extrorsum versis, sanie tenui, erodente stillans, aspectu horrendum, immedicabile. Cancrî eò usque progressi curatio non debet suspici; at solummodo, cum, primis initis, sub cute adhuc integrâ, ad digitorum nutum fluctuat, necdum, in partes subjacentes, altas radices egit. Tunc potest deleri sicut & Tumores præmemorati, quibus etiam possunt addi Ficus, Fungus, Polypus aliique quàmplurimi. Sed quicumque in Tumorum ablatione commendavimus, ea maximè Cultello præstari certum est, contraria verò Cauterio inveni.

\* Dn. Astruc  
 de morb. Venet.

#### IV.

QUID enim Cultello chirurgico tutius aut commodius? Cauterio quid magis inopportunum intutumve? Cultello, si præsertim manu prudentiæ non experte gubernetur, non aliæ caduntur partes, quàm quæ cædi debent, omnes verò possunt excidi, quæ sunt excidendæ. Cauterio non item. Vel enim sub pulveris formâ, inspergitur, vel apponitur unguento mixtum, vel aquoso aliquo vehiculo dilutum. Quoquo autem modo usurpetur, ut ut dextrè id fiat, præcaveri nunquam potest quin hanc vel illam partem, aut acrids, aut moderatius comburat, proit molliorem invenerit aut solidiorem. Hinc quoque, vel indè divagari potest, eaque rodere quæ integra manere debuissent, intacta verò relinquere quæ forent consumenda. Sunt etiam nonnullæ Tumorum partes quarum ne vel minimam superesse multum interest, sacculos puta occallatos, vel ipsas Cancrorum radices. In eas, quoniam nullum ferè habent cum sanguinis circuitu commercium, irrita planè est vis Cauterii. Volsellâ è contra, vel digitis prehensæ, Cultelli operâ, levi prorsus negotio, separantur. Deindè præcaveri nunquam potest quin Cauterio penitus destruitur cutis, at Scalpello faciliè servari potest, siquidem cruciatim, aut quovis alio modo inciditur, extremis digitis postea separantur anguli, vulneris fundo, post sublatum Tumorem, si visum fuerit, aptandi. Tertio si vel ob nimiam in operando celeritatem, impetritiam, vel *anomaliam* vasorum, quam vaticinari fas non est, distributionem, arteria aut vena non spernendæ magnitudinis aperta fuerit, illico, nihilò obstante, ligari potest. Scalpello enim incisâ, statim apparet, nec ante crispatur quàm possit filo constringi, imò, sanguine ubertim erumpente, statim ipsa se prodit. At multò lentius cum Cauterio proceditur, quod, ut possit agere, per tempus aliquod sinendum est. Interea si quod vas erosum fuerit, molestè vellicatum, in carnes

4

morā non mediocriter juvante, reconditur. Ferro tandem (modò cæsum, non verò punctum id fiat) multò minori periculo, quam Caustico, tendones, nervi, membranae vulnerantur, quæ tutò, & quandoque datā operā omninò resecantur. Ex Caustici autem molesto & dolorifico morſu funestissima, qualia jam diximus, cident symptomata.

V.

**E**X eo quod læsa Caustico arteria statim stringatur, atque retrahatur in carnes, verum est cohiberi sanguinem, sed ad breve tempus. Nam ubi primum remisit astringens Cauterii vis, sanguis eò majori pertiniaciā effluit, quò deligandæ arteriæ non ampliùs detur occasio. Facile tamen concesserimus, per Cauterium, minimis saltem in vasculis, subitanæ & durabilem esse sanguinis cohibitionem. sed exindè Cultri utilitas magis elucet; siquidem ex vulnere, per ipsum inflicto, manat sanguinis sufficiens quantitas, quā prævertitur inflammatio, quæ semper, appposito Caustico, nimia consequi solet, ob id imprimis, quòd sanguis nullus effluerit. Frustra quoque opposuerit aliquis dolorem esse mitiorem ex Caustico, quàm ex Cultro. Illud accidit solùm quibusdam in Tumoribus, Fungis forsitan qui naturā suā parùm sentiunt. Sed cæteris in casibus, præterquamquòd non minùs molesta sunt Caustica quàm Ferrum, id habent insuper incommodi, quòd unicā vice, quemadmodum Culter, Tumores, maximè molis amplioris, delere non valeant. Sed multoties apponi debent, quā quidem repetitā appositione, dolores jam lævitiæ æquales, multò diuturniores evadunt. Ad hæc frequentiore Causticorum usu, Tumores benigni in *Scirrhus*, *Scirbi* in Cancros immutantur. Partes Caustici, cujuscumque sit speciei, per apertas vulneris venas receptæ in sanguinem, venenatam ipsi qualitatem inducunt, *Arsenicalia* præsertim, quibus semel tantum applicatis, plurimè convulsi fato occubere. Unam postremò observabimus circa eos Tumores qui versùs radicem quasi in collum arctantur. In iis, quæ collum pertranscunt vasa exiliora sunt, crassissima verò & varicosa quæ in Tumoris molem disperguntur. His ergo apertis, difficiles oriuntur *hemorrhagia*, quæ quidem, si Caustica adhibeantur, vitari nequeunt: quippe cum iis, vulgò à Tumoris mole, ad radices pergendo, iteratis vicibus proceditur; at si culter adhibeatur, statim à radicibus Tumor potest excidi.

*Ergo qui Tumores deleri debent, Ferro potius, quàm Cauterio potentiali, delendi.*

DOMINI DOCTORES DISPUTATURI.

*M. Ludovicus-Jacobus Piperau.*

*M. Carolus Payen.*

*M. Claudius-Antonius Renard.*

*M. Joannes Isoard.*

*M. Henricus Guyot.*

*M. Franciscus Bailly.*

*M. Bartholomæus Murry.*

*M. Joannes-Damianus Chevalier,  
Medicus Regini Consiliarius  
Ordinarius in Insulâ Sancti Do-  
minici.*

*M. Petrus-Antonius Lepy.*

Proponebat Parisiis MICHAEL-PHILIPPUS BOUVART,  
Carnatus, Baccalaureus Medicus, A.R.S.H., 1738, à sextâ  
ad meridiem.